

## Ēšmuokē

Santrauka:  
Draugā paded.

Muokontēis muokīkluo sunkē kluosties kalbas,  
Nikāp nepagausio „glaguolēnē“ žuodē –  
Prakaito apteksio, kāp bielizna skalbus  
Ē savie galvuosio – ons moni užjuodīs.

Muokītuojē tonkē liuob neteks kontrībēs –  
Šēp ē tēp pasokus ves moni i vaga,  
Vo „glaguols“ partrūkēs ē vēsai sokrīpēs  
Būs kāp tas prigierēs, kelnēs atsēsēgēs.

Lig patiuos dešimtas klasēs kuotavuojaus,  
Jug be vēdorēnēs merga niekam tēkus.  
So vēsuom sunkībīem, so vēsās pavuojēs,  
Kāp pritēka jimtēis tēkrā katalēkē.

No vo jau ont gala sotēkau ruskieli –  
Tuoki kavalierio, aštri kāp akouta  
Ons, jau gal sakītē, bova tuoks pašielēs,  
Ka moni pralaužē rusēškā rokoutēis.

Vēn tatā po žuodi, be juokių mondrīstiu,  
Be keistū galīniu, be šaknū, kamienu –  
Ons moni pagluostīs, ka sakītē drīstiuo,  
Ka geriau tou užuodi būtiuo isēmēnus.

No ē padraugavos posmeti neēlga –  
Dēinas liekē grētā, kāp pakalniou rātā,  
Muokītuojēs akies džioģesīs sožvēlga,  
Tuokē staigē lūžē ana nesoprata.

Ne tik vēdorēnē ožbēngiau be varga  
Ē tuoliau jau muokiaus be rimtiesniu trūkiu,  
Nuors pri mona šuona ē neblēka sarga,  
Kors padarē pradē mona kalbū ūkie.